

Rom

¹ Aya Pol, Kristus Jesus nẽ ferfer, aposel wõ auf nigin iweigna fen, Negur nẽ biya od wogõ auf nigin igirnan.

² Biya od anĩ, Negur kulu bagai yogon profet promis od irokenẽdi di, Negur nẽ Itotoya Fateul bun ditoton,

³ are yogon Naal, neda Odug Jesus Kristus nigin, ã tamo nẽ ibor bun are, Dawid nẽ ibor bun wõ yen,

⁴ agef fen, fateul nẽ Awa Ur bunem, ã laa bun tamal kel turĩ fiyen anim, Negurem Jesus ã Yogo Naal megeir barikã ado anĩ yaor kurõ fesin.

⁵ Ì bunem, amã yogon yana seli kulõ fiya nigin, haiden ganan atun temeleid, tamo kayau maweignẽdi di, idi momoi de fen, dõ difouf nigin, amã wau ifenẽya ado aposel nẽ kabĩ malen.

⁶ ãg, Jesus nẽ tamo kayau wowã douf nigin iweignẽdif anidi atun, ubodõgef.

⁷ Tamo kayau ganan Rom taun ubodõgef, Negur ã nigin wau laaf fen, tamo kayau fateul wõ gouf nigin iweignein, ã bun pas enei atotof.

Wau ifenẽya ado wau inosiya, neda Tamada Negur ado Odug Jesus Kristus bunem, ã bun isiyouf.

Pol Rom Ileya Nigin Bagai Wau Iron

⁸ Uruwa bagai, aya ã ganan nigin, Jesus Kristus bunem, neu Negur de afiyek, ere nigin, ãgenei momoiya nigin teneub ganan bun od iyokelen.

⁹ Negur ï nigin aya wau adok iro ken, ï Naal nē biya od wogōya bun aruna aledig, ï ileya mog, aya ã nigin toku neu kosēya bun faimud karī aledig.

¹⁰ Age afe fen, gama Negur orouf are, naab kā fele di, aya ã gein asiyouf nigin aya kosē auf.

¹¹ Aya ã ileyeīya nigin bagai wau irok, are aya uur nē ege luwa tunī megeir ifareya nē anī afeneīf nigin age afef,

¹² anī bunem, aya ã geid, mugu mugu āgenei momoiya ado neu momoiya bunem abob tasennēf.

¹³ Turau tar, aya ã enei to keleī youf anī to orouf, aya, sain musei, ã gein isiya nigin kisi afen, anī ere, aya age fiya nigin, naab katī felef isi, gama enei bun, are aya, Juda sã anidi tunī ganam atun, age afen gen, ã atuneg gei ayeīf nigin age afen.

¹⁴ Negur aya isennan nigin, aya ï bun wareg ado. Anī nigin, Aya, tamo Grik od ado dogo neid tobonuneid keleī anidi ado, tamo Grik od ado dogo neid tobonuneid keleī sã anidi bun, kisi biya adodo, nene yedidiya buneg, wareg enei aūf.

¹⁵ Age fiya nigin, aya Rom taun ubodōgef ã buneg, biya od anī wogōya nigin kisi total alef.

¹⁶ Aya biya od nigin to mama fiyaf, ere nigin, are Negur nē megeir, tamo ganam momoi def, kel gei fouf nigin, Juda idi bun keteme di, Juda sã anidi idi buneg age fouf.

¹⁷ Ere nigin, biya od bun, Negur ï tamo kayau yogon mala bun madur bagai inenēdiya nē naab anī kurō fesif, Negur ï tamo kayau yogon mala bun madur bagai inenēdiya nē naab anī momoiya bunem dogol isif, are Negur nē Itotoya bun

ibodok kilei, “Madur tamo momoiya bunem mata ibodōf.”*

Negur Nē Didi Tenebur Tamo Bun Isiyouf

¹⁸ Negur nē didi, saa ilun tamal, tamo idi dogo neid sanem momoi anī lai difedig anidi neid mosor ado sane ganan bun yaoref,

¹⁹ ere nigin, ereb Negur nigin idi keleī youf are, idi bun yaor, ere nigin, Negur ī idi bun anī yaor fen.

²⁰ Negur teneub saa ado kare fen sain bunem isi gamag, Negur nē tobonunā ileyā kisi feleyā sā anī, are in ibodkeleyā megeir ado ī Negur ya anī, idi yaor diledig. Ereb Negur inodin anī bunem idi keleī, anī nigin, tamo idi galā taka sā.

²¹ Idi Negur kelein, anī ere, idi ī Negur gen to yana dales fen, de difiyēdig, anī ere, idi neid kisi nene yel fen, idi neid waud neneyā anī bunem dogo neid waud gugum kerū felen.

²² Idi amā kisi biya ado dedig, anī ere, idi neneyā wowā de fen,

²³ idi to bura leya Negur nē fula fiya medeīya anī falei difel, bura leya nē tamo, ninā, gaar ado, gaar luwedim diyōdig imedim meleidkanon dinon anī bun dinon.

²⁴ Anī nigin, Negur idi itornēdi di, idi neid waud irōya sane dō de, noli mosor dino amuyē bun dile fen, idi neid bouwedim abob mama difenēdig.

²⁵ Idi Negur nē momoi anī falei difel, idegēya bun dinon, age de fen, idi Negur ereb ereb kare fen anī ban, ereb ereb Negurem kare fen idi

* **1:17:** Habakuk 2:4

yeneid anī dales fen, aruneid daledig. Negur ī faimud yana yaleseyauf. Momoi.

²⁶ Enei nigin, Negur idi mama nē oroya bun itornēdi di, dilen. Idi neid kayaug, Negur bagu fedin geid bouweid bagu fiya ditor ken, falei del, kayau tutur Negur bagu fediya sā anidi geid bouweid bagu difedig.

²⁷ Age fiya bagai, tamog Negur kayau ado bagu fedin anī ditor ken, idi abob bun noli nigin yā gaī de genen. Tamo, tamo tunī geid mama tobonunā age dife fen, idi neid idodōya mala darau dogo ke de dalen.

²⁸ Idi Negur nigin keleī yaleya ditoron, anī nigin, Negur idi itornēdi di, idi neid kisi sanel fen, idi ereb ereb to age fiya nē anī age difedig.

²⁹ Idi tobonunā madur fiya sā fire fire ganan, sane, safina nigin neu dogol yeya ado, to ile oroya anim isokosen. Idi kiyēī, tamo yukesiya, kusī, idegēya ado, sanem barikā. Idi dumen od wogō dedig,

³⁰ idi bou yūya od wogō dedig, Negur dudum difiyēdig, idi kono difedig, idi akoreid dūdig, idi dogo yeneid dalesedig. Idi sane age fiya nigin naab dimirēdig. Idi sineid temeid tar sigoreid to dō difedig.

³¹ Idi kisi biya sā, momoiya sā, waud laa fiya sā, waud yūya sā.

³² Idi Negur nē lo keleī, are idi anī age difef laa gurug difouf, anī ere, idi anī dogol to age difef diledig, anī ere, idi tunī anī age difedig anidig waud difenēdidig.

2

Negur Nē Es Fiya Madur Bagai

¹ Anī nigin, ò galã taka sã, ò aib taka es wiyēdig, ereb taka bun es wiyek, ò ogo boũ uk, ere nigin, ò taka es wiyek, ò ogor de ago wodig.

² Ada keleĩ, Negur nē es fiya idi age difef anidi bun isif, are momoi nē bun Negur es fedig.

³ Anī nigin, tamo ò aib, tunĩ age difef anidi es wiyēid fen, òg anĩ ago wodig, ò Negur nē es fiya anĩ wal afouf wof de?

⁴ Ò, Negur nē biya fiya ò waũ faleiya bun irouyõ isif anĩ to kelei ken, yogon biya fiya, molol ado, feseya sã, idi kisi feleya bagai anĩ, ò kono wof de?

⁵ Anĩ ere, ogon waũ total ado ogon waũ faleiya sã bunem, ò ogo nigin Negur nē didi wõ youf naa bun walouf nigin didi kuru wof, sain anĩ bun Negur nē es fiya madur bagai anĩ yaorouf.

⁶ Negur ĩ “mugu mugu ereb age difen kilei ifenēdiyof.”*

⁷ Idi feseya sã ereb biya age difen bunem, fula fiya medeĩya, yana ado, to bura leya dimirēdig anidi, mata ibodkeleya ifenēdiyof.

⁸ Anĩ ere, idi dogo nigin dogol kisi de fen dimirē di, idi momoi anĩ ditor ken, sane dõ difedig anidi bun, didi ado seyeya wõ youf.

⁹ Morõ ado darau, tamo sane age difedig ganan bun wõ youf, Juda idi bun keteme di, haiden idi buneg age fouf.

¹⁰ Anĩ ere, fula fiya medeĩya, yana ado, wau inosiya, idi biya age difedig ganan bun wõ youf, Juda idi bun keteme di, haiden idi buneg age fouf.

* 2:6: Sam 62:12; Proverb 24:12

¹¹ Ere nigin, Negur ĩ Juda ado haiden, es fiya tekelei bunem es fediyouf.

¹² Idi Moses nẽ lo sa ken, mosor dinof gananeg, Moses nẽ lo sã daũ falauf, idi Moses nẽ lo farumen dibod ken, mosor dinof ganen, Moses nẽ lo nem es fediyouf.

¹³ Negur mala bun, idi lo karĩ dedig anidi madur bagai sã, anĩ ere, idi lo dõ difedig anidi, Negur mala bun madur bagai youf.

¹⁴ Haiden idi lo sã dogo neid kisim erab erab lo irok kilei age difedig, idi lo sã, anĩ ere, idi dogo, dogo nigin lo.

¹⁵ Idi erab erab lo irok anĩ dogo neid waud bun itoton anĩ yaor difef, anĩ nigin, dogo neid kisi es fiya waud bun ibodok animeg, are momoi anĩ, yaor fe di, dogo neid kisim dogo bouweid yu ken, isenneĩd mog fef.

¹⁶ Neu biya od, Jesus nigin tamo kayau aro-kenẽdif anĩ irok kilei, Negur Jesus Kristus bunem, tamo nẽ wau bun iminek anĩ es fouf naa bun, enei agef bagai wõ youf.

Juda Tamo Kayau Ado Lo

¹⁷ Õ ogo nigin aya Juda tamo wof; õ lo bun ufar fen, aya Negur ado nival mauf wo fen, yanã walesef;

¹⁸ õ lom faded yõ di, õ Negur nẽ oroya kelei ken, erab madur bagai anĩ õ biya wof;

¹⁹ õ ogo nigin momoi wof, are õ mala ifofakeleya neid ulum irouya tamo, õ idi gugum bun difaref anidi neid lalan,

²⁰ Õ neneya tamo neid tai fiya tamo, Õ momou neid tise, ere nigin, Õ lo bun keleĩ ado momoi anĩ barikã,

²¹ age fiyauf are, Õ tunĩ ufelnēdidig, Õ ogo to ufelnēdig de? Õ to bē walegei wodig, Õ ogo bē waledig de?

²² Õ to seseirã unoi wodig, Õ seseirã unodig de? Õ idegēya waitou anĩ to bagai oroyōdig, Õ dogo neid tempel bun bē waledig de?

²³ Õ aya lo ado wo fen, yanã walesedig, Õ lo ifodulūya bunem Negur mama wenēdig de?

²⁴ Are Negur nē Itotoya bun ibodok kilei, “Ã bunem, haiden atun Negur yana kono difiyek.”†

²⁵ Õ lo dō wof are, mulū are isennok, anĩ ere, Õ lo ufodulōf are, Õ mulū ileya sã gen wō wof.

²⁶ Anĩ nigin, idi mulū ileya sã anidim lo irok kilei dō difouf are, idi mulū ileyan gen to ilediyauf de?

²⁷ Taka ĩ mulū to ile fen, lo dōf el fouf are, ĩ, Õ lo itotoya ado fen, mulū ulen, anĩ ere, Õ lo ifodulūya tamo ye fen, to es yōf de?

²⁸ Tamo ĩ bouwam dogol Juda tamouf, ĩ Juda tamo bagai sã. Bouwam dogol mulū ilef, areg mulū bagai sã.

²⁹ Anĩ ere, tamo ĩ name bun Juda tamouf, ĩ Juda tamo bagai. Mulū bagai are, Awa Uurem, waud bun age fedig, lo itotoya bunem sã. Tamo age fiya, tamo bunem yana yaleseya to yaledig, anĩ ere, Negur bunem yaledig.

† **2:24:** Asaia 52:5; Esekiel 36:22

3

Negur Age Afouf Yen Are Ī De Age Fouf

¹ Age fiyauf are, tamo ĩ aya Juda tamo yef bun, ere biya yalouf? Mulũ bun ere biya adouf?

² Naab ganam bun musei! Uruwa bagai, Negur nẽ od idi kulatun difouf nigin imeid bun inon.

³ Juda tunĩ momoiya sãf are, naig fouf? Idi neid momoiya sã anim, Negur age fouf yen anĩ to age fouf de?

⁴ To bagai agef ilauf! Negur ĩ momoi bagai, age fe di, tamo ganam idegẽya temeleid tauf. Are Negur nẽ Itotoya bun ibodok kilei,

“Are sain õ wogõ wouf bun, õ madur bagai anĩ yaorouf,

sain õ es diyõf bun, õ wal wediyouf nigin.”*

⁵ Anĩ ere, ada neda madur bagai sã anim, Negur nẽ madur bagai fatuk bagai yaor fouf are, ada ere tauf? Negur ĩ ada bun yogon didi ifanadauf nigin, ĩ madur sã tauf de? Aya tamo nẽ luwa irouya anĩ wogõ auf.

⁶ To bagai agef ilauf! Age fiyauf are, Negur tamo kayau naig fe es fediyouf?

⁷ Taka nem monẽ ye fen, irõf, “Neu idegẽya anim Negur nẽ momoi bagai anĩ yaau du fe di, anĩ bunem, yogon fula fiya medeĩya odugouf are, ere nigin aya fau mosor tamal ya ani, bouwau bun inouf?”

⁸ Ere nigin to eig youf, “Biya anĩ wõ youf nigin, ada sane age tafouf” youf? Tunĩ amam od enei wogõ maudig de fen, amã bouwamã yũya

* **3:4:** Sam 51:4

od dirōdig. Negur idi es feid fen, mala solo ifenēdiyof.

Aibem Taka Madur Bagai Sā

⁹ Amā ere mauf? Juda amā haiden wal fediya de? Gai sā bagai! Amā mogo, Juda ado haiden geid ganan mosor farumen kilei kilei dibodok ya anī, moron.

¹⁰ Are Negur nē Itotoya bun ibodok kilei,
“Madur bagai taka to ibodok, tekelei bagaig sā;

¹¹ taka nem kisi fokōya sā,
taka nem Negur imirēya sā.

¹² Ganan Negur nē naab fasis dife fen,
ganan sesen len;

aibem taka to biya age fedig,
tekelei bagaig sā.”†

¹³ “Idi neid uleidbanī, laa nē meku awa dede fiya
sā gen;

idi neid baleid idegēya wogō dedig.”‡

“Gogour sane nē mū sigoredin ibodok.”§

¹⁴ “Idi neid eweid, isisīya ado dirikeī bagai.”*

¹⁵ “Idi neid yeid, tamo didenkesiyof nigin
tuninirya sā kaisā bagai dirādig;

¹⁶ idi neid iyōya bun, daū fiya ado morō
dinodig,

¹⁷ age de fen, wau inosiya nē naab idi keleī sā.”†

¹⁸ “Idi neid meleid bun, idi Negur nigin kumī
sā.”‡

¹⁹ Gama ada keleī, ereb lo irok are, idi lo
farumen dibodok anidi irokenēdif, anī bunem,

† **3:12:** Sam 14:1-3; 53:1-3; Eklisiastis 7:20 ‡ **3:13:** Sam 5:9

§ **3:13:** Sam 140:3 * **3:14:** Sam 10:7 † **3:17:** Asaia 59:7, 8

‡ **3:18:** Sam 36:1

eweid ganan omutukul del fen, tenebur tamo kayau ganan Negur nē es fiya farumen dibodōf.

²⁰ Anī nigin, Negur ī, lo dō fiya bunem, ī mala bun taka ī madur bagai to youf. Age fiya nigin, lom ada mosor tanon anī yaor fadadig.

Madur Bagai Are Momoiya Bunem

²¹ Anī ere, gama Negur ī tamo kayau yogon mala bun madur bagai inenēdiya nē naab, are lo bunem sã anī yaor fen, are Lo ado profet neid wogōya bun kurō difesin.

²² Negur ī tamo kayau yogon mala bun madur bagai inenēdiya nē naab enei, Jesus Kristus nigin momoiya bunem, idi momoi def ganan bun isif. Juda ado haiden bun de tekelei,

²³ ere nigin, ganan mosor dinon, anī nigin, taka nem Negur fula fiya medeīya bun ibodok ī wagen ileyā kisi feleya sã.

²⁴ Age dife di, Negur nē wau ifenēya anim, kel gei fiya Kristus Jesus na yaledin bunem isin anī bunem, idi ege bagai madur bagai inodif.

²⁵ Negur ī, Jesus nē naud bun momoiya bunem, Negur nē didi yof fen, tamo kayau neid mosor yalelkenēdiya kabī yalouf nigin, Negurem Jesus sesewi foug nigin inenen. Ī yogo madur bagai ya anī yaor fiya nigin, enei age fen, ere nigin, in molol bunem, uruwa mosor dinon anī mala solo ifenēdiya sã itornēdin.

²⁶ Sain enei bun, ī yogo madur bagai ya anī, yaor fiya nigin age fen, are ī yogo madur bagai ye fen, taka ī Jesus bun momoiya ado ī madur bagai youf nigin age fen.

²⁷ Age fiyauf are, yana yaleseya anĩ nain? Yana yaleseya are sã. Ere gariya bunem? Lo dõ fiya bunem de? Sã, momoiya bunem.

²⁸ Ere nigin, ada keleĩ, Negur ã tamo nẽ momoiya bunem madur bagai youf, lo dõ fiya bunem sã.

²⁹ Negur ã Juda neid dogol de? Ñ haiden neid sã de? Eo, ã haiden nedig Negur.

³⁰ Negur ã tekelei, ã mulũ dilen anidi, momoiya bunem madur bagai youf, agef fen, mulũ ileya sãg, momoiya de tekelei anim madur bagai youf.

³¹ Age fiyauf are, ada momoiya eneim lo anĩ tadodõf de? Sã bagai. Age fiya ban, ada lo tarou kafĩ tafalauf.

4

Negur Abraham, Ne Momoiya Bunem Madur Bagai Yen

¹ Age fiyauf are, ada Juda tubuda Abraham, ere anĩ ã gurug fen nigin, ere tauf?

² Abraham yogon kabĩ bunem, madur bagai inenem are, Abraham ã yogo yana yaleseya nigin ereb taka adom, anĩ ere, Negur mala bun sã.

³ Negur nẽ Itotoya ere ye irok? “Abraham Negur nigin momoi ye di, Negur ã Abraham madur bagai yen.”*

⁴ Tamo taka ã kabĩ yalef, yogon mala solo are ege luwa ifenẽya gen sã, are kabĩ mala.

⁵ Anĩ ere, tamo ã madur bagai wõ youf nigin kabĩ to yale fen, Negur, ã dõ fiya sã anidi madur

* **4:3:** Jenesis 15:6, 22

fedidig, ï nigin momoi yef, Negur yogon momoiya are madur bagai yef.

⁶ Dawid ïg, tamo kabĩ bunem sã, Negur madur bagai yen, tamo anĩ nē el fiya nigin wogō yen:

⁷ “Idi neid kũ fenēya nigin weder tu keledig, idi neid mosor yaleledig, are el fedif.

⁸ Tamo ï yogon mosor nigin Odug to bagai iwesnēf, ï el fiyek.”†

⁹ El fiya enei mulũ ileyã neid dogol de? Sã, are mulũ ileyã san neideg. Age fiya nigin, amã morōdig, Negur Abraham nē momoiya bunem ï madur bagai yen.

¹⁰ Ere sain bun Negur ï age yen? Ì mulũ ilel mog de, mulũ ileyã sã mog? Ì mulũ ilel mog sã, ï mulũ ileyã sã mog.

¹¹ Ì mulũ ileyã nē uris, are ï fau mulũ ileyã sã mog, momoiya bunem Negur madur bagai yen anĩ nē uris yalen. Anĩ nigin, ï mulũ ileyã san momoi def ganã neid temeid, anĩ bunem, Negur idi madur bagai youf.

¹² Ì mulũ ileyã nedig temeid, idi mulũ dilen dogol sã, anĩ ere, idi tubuda Abraham ï mulũ ileyã sã mog, momoiya ado iyon anĩ yebura dō de diyōdig anidi nedig.

¹³ Negur, Abraham ado in tubu tar irokenēdin, are Negurem ereb ereb ganã idi afenēdi di, akorediyof yen anĩ, lo bunem sã, anĩ ere, madur bagai momoiya bunem isif anĩ bunem.

† 4:8: Sam 32:1, 2

14 Idi lo dō difedig anidim, Negurem erēb erēb ganan idi afenēdi di, akorediyouf yen anī akorediyouf are, momoiya are ege ile di, erēb Negur iron are ege kilēf,

15 are lo didi irou isidig nigin. Lo sãf are, lo ifodulūyag sã.

16 Anī nigin, erēb Negur age afouf yen are, wau ifenēya bunem, kabī yalef ya anī yaorouf nigin, momoiya bunem isidig, are Negur ī, ege luwa Abraham nē ibor nē tubu tar ganan afenēdiyof yen anī, megeir fiya nigin age fedig, idi lo dō difedig anidi bun dogol sã, anī ere, idi Abraham nē momoiya dō difedig anidi buneg. Age fiya nigin, Abraham ī, ada ganan neda tamada.

17 Are Negur nē Itotoya bun ibodok kilei, “Aya ō teneub akor musei neid temeid anenon.”‡ Negur mala bun, ī neda tamada, Abraham Negur nigin momoi yen, Negur ī tamo gare den mata ifeneīd fen, erēb to ibodok anī iweig di, agef wō yedig, Negur ī anī.

18 Wau iseya nigin gariya taka sã bun, Abraham in wau iseya bun momoi yen, are ī teneub akor musei neid temeid wō youf nigin age fen, are Negur ī eig ye irokenen kilei, “Ogon ibor agef yenēf.”§

19 In momoiya bun felu reya sã, ī handred yar age fiya ibodon nigin, yogon bouwa anī laa gen ile fen, Sara kesu yaleya nigin gen laa gen ilen.

20 Anī ere, erēb ī Negur iron anī nigin to wau uru fen, in momoiya to ilef isi fen, anī ere, ī yogon

‡ 4:17: Jenesis 17:5 § 4:18: Jenesis 15:5

momoiya megeir fe fen, Negur fula fiya medeïya ifenen.

²¹ Abraham ï, ereb Negur age afouf yen anï age fiya nigin, ï megeir ado, ye fen, momoi bagai yen.

²² Anï nigin, Negur, Abraham nigin ï madur bagai yen.

²³ Od “Negur ï nigin madur bagai yen” are, ï nigin dogol to itoton,

²⁴ anï ere, Negur ada nigin madur bagai youf anï nigned itoton, are ada, Negur, neda Odug Jesus tamo gare den bun tamal kel turï fiyen nigin, momoi tauf anï.

²⁵ Negur ï Jesus neda mosor nigin laa bun inene ken, ada madur bagai youf nigin, Jesus mata kel turï fiyen.

5

Maror Kulïya Ado

¹ Anï nigin, momoiya bunem, Negur ada madur bagai yen nigin, ada neda Odug Jesus Kristus bunem, Negur ado maror bun tabodok.

² Neda momoiya bunem, Jesus Kristus ï, ada Negur nẽ wau ifenëya enei ada gama an tafaref anï namen irou ileda di, telen. Anï nigin, ada Negur nẽ fula fiya medeïya nigin, wauda ise fen, kulï taudig.

³ Anï nigin dogol sã, ada neda morõ nigned kulï taudig, ere nigin, ada keleï, morõ bunem feseya sã anï wõ yedig,

⁴ feseya sã anï bunem atïya biya wõ yedig, atïya biya bunem wau iseya wõ yedig.

⁵ Wau iseya anim ada to fõ fadadig, ere nigin, Awa Uur Fateul Negurem ifanadan anĩ bunem, in wau laa fiya ada wauda bun fi felen.

⁶ Ada fau maleg tabod mog, in sain bun bagai, Kristus ĩ, ada Negur dõ fiya sã anidi nigin laa fen.

⁷ Tamo takam, taka madur bagai nigin, laa fiya malai bagai, agef fen, tamo takam aib taka tobonunã biya ado nigin total ino fen, laa fouf be.

⁸ Anĩ ere, Negur ada nigin yogon wau laa fiya anĩ, enei bun ada ifelnadaf, are ada fau mosor bun tabod mog, Kristus ada nigin laa fen.

⁹ Gama yogon naud bunem, Negur ada madur bagai yen nigin, ada ĩ bunem Negur nẽ didi bun tamal baban momoi bagai yalelkanadauf!

¹⁰ Sain ada Negur nẽ kiwai tamo tar tabod mog, yogon Naal nẽ laa bunem, ada ĩ geid komo fadan. Gama ada ĩ geid komo fadan nigin, baban momoi bagai, Kristus nẽ mata bunem ada kel gei fadauf!

¹¹ Enei dogol sã, anĩ ere, ada, ereb Negur neda Odug Jesus Kristus bunem age fen nigineg kulĩ taudig, are Jesus Kristus bunem, ada gama komo fiya talen.

Adam Bunem Laa Wõ Yen, Kristus Bunem Mata Wõ Yen

¹² Anĩ nigin, tamo tekelei bunem, mosor ket tenebur wõ ye di, laa mosor bunem wõ yen, age fiya bagai, ganan mosor dinon nigin, laa, tamo ganan bun wõ yen.

¹³ Lo wõya sã mog, mosor tenebur ibodon. Anĩ ere, lo sãf are, mosor to iwesauf.

¹⁴ Anĩ ere, Adam nẽ sain bunem ile Moses nẽ sain bun, idi Adam age fen gen, to Negur nẽ ĩtãfiya

wal difen anidig laa farumen dibodon, Adam ï taka fau isiyouf nē malakanon.

¹⁵ Anī ere, Negur nē ege luwa are mosor Adam inon gen sã. Tamo tekelei nē mosor bunem musei gare den ouf are, Negur nē wau ifenēya ado ege luwa, tamo tekelei Jesus Kristus nē wau ifenēya bunem isin, naig fiya bagai tamo musei bun gogū fouf!

¹⁶ Takag age fiya, Negur nē ege luwa are, tamo tekelei nē mosor mala age fiya sã. Es fiya mosor tekelei dōf fen, mosor inon nigin bouwa bun od yūya irou isin, anī ere, ege luwa mosor musei dōf fen, madur bagai anī irou isin.

¹⁷ Tamo tekelei nē mosor bunem, laa anī, tamo tekelei anī bunem mudur ibodon ouf are, idi Negur bunem, wau ifenēya barikã ado, madur bagai anī nē ege luwa barikã dalef anidi, momoi bagai, tamo tekelei Jesus Kristus bunem, mata bun mudur dibodōf!

¹⁸ Anī nigin, mosor tekelei bunem, Negur tamo ganan mosor temeleid yen, age fiya gen, madur bagai tekelei age fen bunem, Negur tamo nigin madur bagai ye fen, tamo ganan nigin mata irou isin.

¹⁹ Tamo tekelei nē od wal fiya bunem, musei mosor adodo wowã den, age fiya gen, tamo tekelei nē dō fiya bunem, musei madur bagai wowã douf.

²⁰ Mosor ifageya nigin, lo isin. Anī ere, mosor ifaga di, Negur nē wau ifenēya fatuk bagai ifagan,

²¹ are mosor laa bun mudur ibodon gen, wau ifenēya madur bagai bunem mudur ibod ken,

neda Odug Jesus Kristus bunem mata ibodkeleya
 irou isiyouf nigin age fen.

6

Mosor Bun Laa, Kristus Bun Mata

¹ Age fiyauf are, ada ere tauf? Negur nē wau
 ifenēya ifagauf nigin, ada mosorei tauf de?

² Sā bagai! Ada mosor bun gare taun; naig fe di,
 ada anī bun tau tabodōf?

³ Ada ganan Kristus Jesus bun naan talen, are
 yogon laa bun naan talen anī, ā to keleī de?

⁴ Anī nigin, ada, laa bun naan talen bunem,
 ī geid mū fadan, are Kristus, Tama nē fula fiya
 medeīya nē megeir bunem, tamo gare den bun
 tamal kel turī fen gen, adag ibodōya mata bun
 mata tabodōf nigin age fen.

⁵ Ada yogon laa bun, enei gen ī geid bagu fadan
 ouf are, ada momoi bagai yogon kel fāya buneg, ī
 geid bagu fadauf.

⁶ Ada keleī, mosor nē bouwada yukesiyouf
 nigin, neda oroya tubu ī geid aa tetek bun yun,
 are ada mosor nē ferfer to tabodōf nigin age fen,

⁷ ere nigin, taka ī laa fen are, ī mosor nē megeir
 bun tamal yalelnen.

⁸ Ada Kristus geid gare taun ouf are, adag ī geid
 mata tabodōf nigin momoi tauf.

⁹ Ere nigin, ada keleī, Kristus tamo gare den
 bun tamal, kel turī fiyen nigin, ī baban to bagai
 laa fouf, ī laa nē megeirem baban to irounēf.

¹⁰ Ī laa fen are, ī mosor nē megeir yukesiyouf
 nigin, sain tekelei bun dogol laa fen, anī ere, mata
 ī ibodok are, ī Negur bun mata ibodok.

11 Age fiya bagai, ã aug nigin, mosor bun gareg fen, Kristus Jesus bunem, Negur bun mata ubodōgef anī kisi gouf.

12 Anī nigin, āgenei bouweī bura leya nē anī bun, mosor mudur ibodō di, ã in oroya sane anī dō gouf nigin to ago gouf.

13 Āgenei bouweī tunī, sane nē aruna yaleya nigin mosor bun to wenēgouf, anī ere, idi laa bun tamal kel turī fedin gen, ã aug Negur wenēg fen, āgenei bouweī tunī, madur bagai nē aruna yaleya nigin Negur bun wenēgouf.

14 Mosor āgenei odug to ibodōf, ere nigin, ã lo farumen sã, wau ifenēya farumen ubodōgef.

Madur Bagai Nē Ferfer

15 Age fiyauf are, naig fiya? Ada lo farumen sã, wau ifenēya farumen tabodok nigin, mosor tanouf de? Gai sã bagai!

16 Sain ã aug, taka sigor dōg fen, ferfer gen ĩ aruna walegef, ã taka sigor dō gef anī nē ferfer ubodōgef anī, ã to keleī de? Ā mosor nē ferfer ubodōgef, are laa bun irouleyeik, ã Negur dō fiya nē ferfer ubodōgef, are madur bagai bun irouleyeik.

17 Anī ere, ada Negur de tafiyēf, ere nigin, ã uruwa bun mosor nē ferfer ubodōgen, anī ere, ã tai fiya difenein anī, āgenei wauī adok dō gen.

18 Ā mosor bun tamal yalelneī di, madur bagai nē ferfer wō gen.

19 Aya, ã bouweī bun felu reya nigin, tamo nē tobonunã bunem wogō auf. Ā uruwa bun ferfer gen, āgenei bouweī, sane amuyē ado bun unogen,

ago ge di, fatuk bagai sane len, age fiya gen, gama ã ferfer gen, ãgenei bouweĩ, madur bagai bun unoge di, fateul bagai wõ gouf.

²⁰ Sain ã mosor nẽ ferfer ubodõgen, ã madur bagai nẽ farumen to ubodõgen.

²¹ Sain anĩ bun, ereb ã gama mama yeik bun tamal, ã ere mala biya walegen? Anĩ ganan are, laa bun irou isif.

²² Anĩ ere, ã gama mosor bun tamal yaleneĩ di, Negur nẽ ferfer wõ gen, anĩ nẽ mala biya are, fateul bun irouleyeik, anĩ nẽ kaũ are, mata faimud ibodkeleya.

²³ Ere nigin, mosor mala, are laa, anĩ ere, Negur nẽ ege luwa, are neda Odug Kristus Jesus bun mata faimud ibodkeleya.

7

Tamo Kayau Bagu Fiya Bun Od Malakanon

¹ Turau tar, aya, Moses nẽ lo keleĩ tamo ã arokeneik, lo are tamo mata ibodok sain bun dogol, ĩ bun megeir ado anĩ, ã to keleĩ de?

² Eig fiya gen, lo irok, kayau tamo aiwaf, ĩ tamo mata ibodok sain bun dogol ĩ aiwaf, anĩ ere, ĩ aiwa laa fouf are, kayau ĩ bagu fiya nẽ lo farumen to ibodõf.

³ Age fiya nigin, kayau ĩ aiwa monog fau mata ibod mog, ĩ baban tamo taka yalouf are, ĩ seseirã kayau douf. Anĩ ere, yogon tamo laa fouf are, lo anim kayau to irounẽ di, ĩ tamo taka yaloufeg, ĩ to seseirã kayau douf.

⁴ Anĩ nigin, neu turau tar, ãg Kristus bouwa bunem lo bun gare gen, are ã, taka ĩ tamo gare

den bun tamal kel turĩ fiyen anĩ nẽ wowãg fen, ada Negur bun faat biya taũf nigin ago gen.

⁵ Sain ada bouwa nẽ oroyam ironadan bun, lo anim mosor nẽ oroya turĩ fe di, mosor nẽ oroya anim bouwada bun kabĩ yalen, anĩ bun, ada laa nẽ faat taun.

⁶ Anĩ ere, gama ada ereb mogo ironadan bun gare taun nigin, ada lo bun tamal yalelnadan, anĩ nigin, ada Awa Uur nẽ naab mata bun aruna talef, naab tubu lo itotoya bun sã.

Mosor Ado Kusĩya

⁷ Age fiyauf are, ada ere tauf? Lo anĩ mosor de? Sã bagai! Momoi, lo sam are, aya mosor are ereb yef anĩ to keleim. Ere nigin, taka nẽ safina ile to oroya nigin lo to age ye irom are,* aya taka nẽ safina ile to oroya nigin to keleim.

⁸ Anĩ ere, ãtãfiya anim mosor modoũ ifenẽ di, aya nameun mosorem taka nẽ safina ile oroya fire fire ganan inodin. Ere nigin, lo sãf are, mosor are laa fen.

⁹ Uruwa aya lo sã bun mata abodon, anĩ ere, ãtãfiya isi di, mosor mata fã ye di,

¹⁰ aya laa fiyan. Lo anĩ mata irusiyouf aun, anĩ ere, ã momoi bagai laa irusin anĩ ailen.

¹¹ Ere nigin, ãtãfiya anim mosor modoũ ifenẽ di, mosorem aya idegna fen, ãtãfiya bunem laa bun inenan.

¹² Age fiyauf are, lo are fateul, ãtãfiya are fateul, madur fen, biya.

¹³ Age fouf are, ereb biya anim aya bun laa irusin de? Sã bagai! Anĩ ere, mosor are mosor ya

* **7:7:** Eksodas 20:17; Diuteronomi 5:21

anĩ yaorouf nigin, mosorem ereb biya bunem aya bun laa ırousin, are mosor itãfiya bunem mosor bagai wõ youf nigin age fen.

¹⁴ Ada keleĩ, lo are Negur bun tamal, anĩ ere, aya bouwa buru nẽ, mosor nẽ ferfer gen na nẽ sur fiyan.

¹⁵ Ereb aya age afef, are aya keleĩ sã. Ere nigin, ereb aya age fiya nigin orouf, are aya to age afedig, anĩ ere, ereb aya to orouf anĩ, aya age afedig.

¹⁶ Ereb aya age fiya nigin to orouf anĩ, aya age afouf are, aya lo are biya auf anĩ ifelnadaf.

¹⁷ Anĩ nigin, aya yug anĩ to age afef, anĩ ere, mosor aya nameun ibodok anim age fef.

¹⁸ Aya keleĩ, ereb biya taka, aya nameun, are mosor nẽ bouwau enei bun to ibodok. Ere nigin, aya ereb biya age fiya nigin orouf, anĩ ere, aya age fiya kisi feleya sã.

¹⁹ Ere nigin, ereb aya age afef, are ereb biya age fiya nigin orouf anĩ sã, anĩ ere, ereb sane aya age fiya nigin to orouf anĩ, aya faimud age afedig.

²⁰ Aya ereb to orouf anĩ age afouf are, ayam anĩ to age afef, anĩ ere, mosor aya nameun ibodok anim age fef.

²¹ Anĩ nigin, aya tobonunã eig fiya kabĩ yale mog, ailef: Sain aya biya age afou fenẽ di, sane anĩ aya ado ibodõdig.

²² Ere nigin, aya nameun Negur nẽ lo nigin wau kulĩ yedig,

²³ anĩ ere, aya lo taka anĩ bouwau tunĩ bun kabĩ yale mog, ailef, are neu kisi biya nẽ lo ado kusĩ de

fen, aya, mosor, bouwau tunĩ bun kabĩ yalef anĩ nẽ lo nẽ kalabus tamo inenadig.

²⁴ O aya malaulon bagai! Aim anĩ aya laa nẽ bouwau enei bun tamal yalelnauf?

²⁵ Neda Odug Jesus Kristus age fen bunem Negur ada yalelnadan nigin ã de tafiyẽf!

Age fiyauf are, aya yug neu kisi bun are, Negur nẽ lo nẽ ferfer, anĩ ere, aya mosor nẽ bouwau enei bun, mosor nẽ lo nẽ ferfer.

8

Awa Uur Bunem Mata Ibodõya

¹ Anĩ nigin, idi Kristus Jesus bun dibodok anidi bun, mosor dinon nigin bou yũya taka gama to ibodok,

² ere nigin, Kristus Jesus bunem, mata nẽ Awa Uur nẽ lo anim, mosor ado laa nẽ lo bun tamal yalelnan.

³ Mosor nẽ bouwa felu reya nigin, lo anim age fiya nigin kisi feleya sã anĩ Negur age fen, are ã yogon Naal, mosor tamo nẽ bouwa gen bun, mosor yaleleya nẽ sesewi fiya ibodõf nigin sur fiyen anĩ bunem, Negur ã, mosor, mosor tamo nẽ bouwa bun ibodok anĩ nẽ megeir yukesin,

⁴ are madur bagai wõ youf nigin lo irok anĩ, bouwa nẽ oroya tator ken, Awa Uur nẽ oroya bun tabodõdig ada bun, kisi falauf nigin, Negur ã age fen.

⁵ Idi bouwa nẽ oroya bun dibodõdig anidi, dogo neid kisi are, ereb mosor nẽ bouwa orof anĩ bun yenẽdig, anĩ ere, idi Awa Uur nẽ oroya bun dibodõdig anidi, dogo neid kisi are, ereb Awa Uur orof anĩ bun yenẽdig.

⁶ Kisi mosor nē bouwa bun yenēdig, are laa nē, anī ere, kisi Awa Uur bun yenēdig, are mata nē ado wau inosiya nē,

⁷ ere nigin, kisi mosor nē bouwa bun inodig, are Negur kiwai ifenēdig, are Negur nē lo farumen to ibodōdig, ī age fiya nigineg kisi feleya sã.

⁸ Idi mosor nē bouwa bun dibodōdig anidi, Negur wau al fiya ifenēya kisi feleya sã.

⁹ Anī ere, Negur nē Awa Uur ã namein ibodōf are, ã mosor nē bouwam to ulum iroukeneif, anī ere, ã Awa Uurem ulum iroukeneif. Anī ere, taka ī Kristus nē Awa Uur sãf are, ī Kristus nē sã.

¹⁰ Anī ere, Kristus ã namein ibodōf are, āgenei bouweī mosor nigin laa foufeg, āgenei uur madur bagai nigin mata ibodok.

¹¹ Ī Jesus tamo gare den bun tamal, kel turī fiyen anī nē Awa Uur, ã namein ibodōf are, ī Kristus tamo gare den bun tamal, kel turī fiyen, yogon Awa Uur ã namein ibodok anī bunem, āgenei bura leya nē bouweī matag ifeneif.

¹² Anī nigin, turau tar, ada wareg ado, are ada mosor nē bouwa to dō tafouf, bouwa nē oroya bun to tabodōf.

¹³ ã bouwa nē oroya bun ubodōgouf are, ã gare gouf, anī ere, Awa Uur bunem ã bouwa nē tobonunã anī ukesigouf are, ã mata ubodōgouf,

¹⁴ ere nigin, idi Negur nē Awa Uurem uyu iroukenēdif are, idi Negur nē gere tar.

¹⁵ ã kumīya nē ferfer ineneīya nē uur to walegen, anī ere, ã Negur nē gere tar ineneīya nē Awa Uur walegen. Anī nigin, ī bunem ada taweig fen,

“Aba,* Dei” taudig.

¹⁶ Awa Uur yogo, ada neda uur bun kurō falaisi, ada Negur nē gere tar yedig.

¹⁷ Ada in gere tar ouf are, ada ereb el fiya biya Negur ifanadauf nigin promis od iron anī talouf. Ada Kristus geid weim yogon fula fiya medeīyag talouf nigin ada momoi bagai ī geid weim yogon darau talouf are, ada Kristus geid weim ereb el fiya biya Negur ifanadauf nigin promis od iron anī talouf.

Fula Fiya Medeīya Dumen Nē

¹⁸ Aya kisi afef, fula fiya medeīya ada bun yaorouf, are ada neda darau gama talef anī wal fiya bagai.

¹⁹ Ereb ereb ganan Negur inodin are, Negur yogo gere tar yaor fediyouf nigin, fatuk bagai tari difedig.

²⁰ Ere nigin, ereb ereb ganan Negur inodin are, Negur uruwa idi yogon oroya dō difouf nigin kisi fen anī idi to dō difedig, are dogo neid oroya bunem sã, anī ere, ī agef inodin anī nē oroya bunem. Anī ere, waud iseya ado,

²¹ are ereb ereb ganan Negur inodin, idig dogo bura leya nē kafī fiya bun tamal yalelneid fen, Negur nē gere tar neid fula fiya medeīya nē karika ibodōya bun gurif iroulediyouf.

²² Ada keleī, ereb ereb ganan Negur inodin, idi kesu gō fiya nē darau bun gen, gariya bunem osi def disi, gama sain enei bun bargaig, age difef.

²³ Anī dogol sã, anī ere, ada, Awa Uur, are dumen fula fiya medeīya ada talouf nē faat uyulil

* **8:15:** Anī nē gariya, Aram od bun ‘Dei.’

yūya anī talen, ada dugeg, Negur ada bouwada kel geif fen, ada yogon gere tar bagai ya anī yaor fe kurō falaisiyouf nigin, fatuk bagai tari tafe fen, namedan osi taudig.

²⁴ Ada kel gei fadan sain bun, ada wauda iseya enei talen. Anī ere, wau iseya malam ileyā are, wau iseya bagai sã. Aim anī, ereb ī mogo ilef nigin wau isauf?

²⁵ Anī ere, ada ereb ada fau ileyā sã nigin wauda isauf are, ada totol tano fen, tari tafouf.

²⁶ Age fiya gen, Awa Uur ī neda felu reya bun isennadadig. Ada ereb nigin kosē tauf anī ada keleī sã, anī ere, Awa Uur yogo od faded fiya kisi feleyā sã anī, osi ye fen, ada nigin kosē yedig.

²⁷ Age fe di, Negur ada wauda fele fedig, ī Awa Uur nē kisi keleī, ere nigin, Awa Uur ī tamo kayau fateul nigin Negur nē oroya kilei kosē yedig.

Ada Kusī Wal Difen Anidi Wal Fediya

²⁸ Ada keleī, ereb ereb ganā bun, Negur yogo nigin waud laa fedig anidi neid biya fiya nigin Negur kabī yaledig, idi yogon oroya kilei iweignēdin anidi.

²⁹ Idi Negurem mogo kelein anidi, Negur idi yogo Naal gen wowã douf nigineg mogo igirnēdin, are yogon Naal, tura tar musei atun, kesu matu wō youf nigin age fen.

³⁰ Agef fen, idi Negur igirnēdin anidig, ī iweignēdin, idi Negur iweignēdin anidig, ī madur bagai fiyēdin, idi Negur madur bagai fiyēdin anidig, ī fula fiya medeīya ifenēdin.

³¹ Age fiyauf are, ada enei nigin ere tauf? Negur ī nedauf are, aim anī ada daū fadaya kisi feleya?

³² Ī yogo Naal bagai nigin to katū ye fen, ada ganan nigin yogo Naal itornen anī, naig fe di, ĩ yogo Naal ado ereb ereb gananeg, ege kilē to ifanadauf?

³³ Aim anī, Negur igirnēdin anidi kot bun in-enēdiyof? Negur yogo idi madur bagai fiyēdidig.

³⁴ Aim anī, idi mosor dinon ye fen, idi bouweid bun od yūf? Kristus Jesus ĩ mogo laa fen, agef feneg, ĩ kel turī fe di, matan, ĩ Negur ima biyalē ibod ken, ada nigineg kosē yedig.

³⁵ Aim anī, ada Kristus nē wau laa fiya bun tamal fara fadauf? Kafī fiya, morō, darau, naū, gemū, waila be, dimigem age fouf de?

³⁶ Are Negur nē Itotoya bun ibodok kilei,
 “Ō nigin amā naa tekelei adok laa gurg mafef;
 amā sipsip didenkesiya nigin age fiya gen dileman.”†

³⁷ Anī ere, enei ganan bun, ada, ĩ ada nigin wau laa fen bunem, ada kusī wal difen anidi wal fediya tabodok.

³⁸ Aya momoi auf, laa, mata, engel, kaa sesen, ereb gama nē, ereb dumen nē, ereb megeir taka,

³⁹ ilun, kuren bagai be, ereb ereb ganan inodin bun ereb takam, Negur nē wau laa fiya, neda Odug Kristus Jesus bun ibodok anī bun tamal, ada fara fadaya nigin kisi feleya sã.

9

Negur Yogo Bagai Igin

† **8:36:** Sam 44:22

¹ Aya Kristus bun momoi orok, aya idegēya sã, neu kisi es fiya wau bun ibodok, Awa Uur Fateul bunem, aya bun anĩ megeir fef,

² are aya fatuk bagai wau gudũf fen, aya faimud wau bun morõ ado.

³ Ere nigin, aya, neu turau tar, neu ibor anidi nigin, aya yug isisna fen, Kristus bun tamal yalelnauf anĩg, aya orouf.

⁴ Idi Israel tamo kayau. Negur nẽ gere tar ya anĩ dogo neid, Negur nẽ fula fiya medeĩya anĩ, idi bun yaor fen, Negur ado bar itenēya, lo yaleya, tempel bun Negur yana yaleseya ado, ereb Negur age afouf ye fen igirin, are dogo neid.

⁵ Tubuid tar Abraham, Isak, Jakop are dogo neid, idi neid ibor anĩ isi isi Kristus wõ yen, Kristus ĩ Negur, ganan ĩ farumen dibodok, faimud ĩ yana talesauf! Momoi.

⁶ Are Negur nẽ od irofosiya gen sã. Ere nigin, Israel ibor bun wõ den anĩ, ganan Israel sã.

⁷ Idi Abraham nẽ ibor nẽ tubu tar ba, anĩ ere, ganan Abraham nẽ gere tar bagai sã. Age fiya ban, “Isak bunem, ogon ibor tar douf.”*

⁸ Are, tamo nẽ tobonunã nẽ naud bunem Abraham nẽ gere tar wowã den anidi ganan, Negur nẽ gere tar sã, anĩ ere, promis nẽ gere tar idi, Abraham nẽ ibor tar youf.

⁹ Negur nẽ promis od anĩ eig fiya, “Yogon sain bun bagai, aya kelauf, Sara kesu adouf.”†

¹⁰ Anĩ dogol sã, anĩ ere, Rebeka nẽ gere tar tama tekelei ado, are tubuda Isak.

* **9:7:** [Jenesis 21:12](#) † **9:9:** [Jenesis 18:10, 14](#)

11 Anĩ ere, kesu uru fau gō fiya sã bun, ereb biya be sane be age fiya sã mog, Negur nẽ oroya anĩ, kabĩ bunem sã, iweignẽdif ĩ bunem, yogon igirĩya bun ifarauf nigin,

12 ĩ Rebeka irokenen, “Matu anĩ, ibuye nẽ aruna yaleyẽf.”‡

13 Are Negur nẽ Itotoya bun ibodok kilei, “Aya Jakop nigin wau laa fen, anĩ ere, Esau to oroun.”§

14 Age fiyauf are, ada ere tauf? Negur madur sã de? Sã bagai!

15 Ere nigin, Negur Moses irokenen, “Aya aib nigin wau yuk anĩ bun, wau yũya afenẽf, aya aib nigin wau irok, ĩ nigin wau yenẽf.”*

16 Anĩ nigin, are, tamo nẽ oroya be kabĩ total yaleya bunem sã, Negur nẽ wau yũya bunem.

17 Negur nẽ Itotoya bun, Isip nẽ king Farao nigin eig ye irok, “Aya õ enei nigin bagai king anenon, are aya õ bun neu megeir yaor afe di, teneub ganan bun, neu yanau kurõ difalaisiyouf nigin age afen.”†

18 Anĩ nigin, Negur aib ĩ wau yũya ifenẽya nigin orof bun, ĩ wau yũya ifenẽdig, agef fen, ĩ aib nẽ wau katĩ feleya nigin orof bun, ĩ katĩ feledig.

19 Ã takam aya irokanauf, “Age fiyauf are, ere nigin Negur fau ada bouwada bun od yuk? Aim anĩ yogon oroya katĩ felef?”

20 Anĩ ere, tamo õ ai anĩ Negur od solo urokenẽf? “Ereb kare fen anim ĩ kare fen anĩ, ‘Ere nigin eig wo unoyan?’ fiyẽf de?”‡

‡ 9:12: Jenesis 25:23 § 9:13: Malakai 1:2, 3 * 9:15: Eksodas 33:19 † 9:17: Eksodas 9:16 ‡ 9:20: Asaia 29:16; 45:9

21 Mis inoya tamo ĩ mafer de tekelei anim, mis uru, taka kabĩ biya ifeněya ně, taka kabĩ sane ifeněya ně, yogon oroyam inoya kisi feleya sã de?

22 Negur ĩ yogon didi anĩ yaor fe di, yogon megeir anĩ tamo kayau keleĩ youf nigin wau iro ken, yogon didi idi bun ile, daũ feidlauf anidi nigin molol bunem loloum fedid di, sain meluk ibodon ouf are, ada ere tauf?

23 Negur ĩ idi fula fiya medeĩya dalouf nigin dodok fe fen, yogon wau yũya ifenědiyof anidi bun, yogon fula fiya medeĩya barikã anĩ yaor fiya niginew wau iron ouf are, ada ere tauf?

24 Ada buneg Negur iweignadan, Juda temeleid dogol sã, haiden buneg.

25 Are Hosia ně itotoya buneg Negur wogõ yef kilei,

“Aya idi neu tamo kayau sã anidi, neu tamo kayau auf,
age afe fen, aya neu oboiyou sã anĩ, neu oboiyou auf,”§

26 takag,

“Negur ‘Ã neu tamo kayau sã’ yen ně modoũ anĩ bun,
idi anĩ ‘Negur mata ibodõya ně gere tar’ youf.”*

27 Asaia Israel nigin iweig iron,
“Israel tamo kayau maaĩ ubun mumul gen musei bagai,
anĩ ere, musei sã dogol kel gei fediyof.

28 Ere nigin, Odug ĩ teneub bun,

§ 9:25: Hosia 2:23 * 9:26: Hosia 1:10

yogon tamo kayau es fediyouf nē od ganan
kaisā bagai dōf agef kisi falauf.”†

²⁹ Are Asaia mogo iron kilei,
“Odug saa ilun nē kusī tamo guri feid uyu iroudig
anī,
neda ibor nē tubu tar tunī to itornēdim are,
ada Sodom gen wō taum,
ada Gomora gen tabodom.”‡

Israel Tamo Kayau Momiya Sā

³⁰ Anī nigin, ada ere tauf? Haiden idi madur
bagai anī to dimiren anidi, momoiya bunem
madur bagai anī dalen.

³¹ Anī ere, Israel idi madur bagai nē lo dō difen,
idi madur bagai anī yaleya sā.

³² Ere nigin yaleya sā? Idi Negur nigin mo-
moiya bunem dō fiya sā, anī ere, lo dō fiya
bunem, Negur mala bun madur bagai dalouf
nigin age difen nigin. Idi ye tū fiya nē meein anim
yeid tū fen.

³³ Are Negur nē Itotoya bun ibodok kilei,
“Lo weleg, aya Saion oun tamo yeid tū fiya nigin
meein taka,
idi kubū douf nigin sa tuwa taka anof,
age afe di, taka ī, ī nigin momoi youf, ī mama to
bagai yalouf.”§

10

¹ Turau tar, aya Negur ī Israel kel gei fediyouf
nigin wau iro ken, Negur bun kosē audig.

† 9:28: Asaia 10:22, 23 ‡ 9:29: Asaia 1:9 § 9:33: Asaia 8:14;
28:16

² Aya idi nigin kurõ afeis eig auf, idi Negur nigin kisi total dinodig, anĩ ere, idi neid kisi total are keleĩ bunem sã.

³ Ere nigin, idi madur bagai Negur bunem isif anĩ to keleĩ ken, dogo neid madur bagai anĩ dalouf nigin dimiren, age dife fen, idi, Negur tamo kayau yogon mala bun madur bagai inenēdiya nē naab anĩ ditoron.

⁴ Kristus ĩ, idi momoi def ganan madur bagai wowã douf nigin, lo nē idikeleya wõ yen.

⁵ Moses ĩ madur bagai lo ganan dõ fiya bunem isif nigin eig ye itoton, “Tamo ĩ lo enei dõ fef, ĩ anĩ bunem mata ibodõf.”*

⁶ Anĩ ere, madur bagai momoiya bunem isif anĩ eig ye irok, “Õ waũ bun to eig wo urõf, ‘Aim anĩ saa ilun iselauf?’† ” (are, Kristus irou isiyouf nigin)

⁷ “oo ‘Aim anĩ teneub kur bagai isilauf?’‡ ” (are, tamo gare den bun tamal Kristus irou isauf nigin).

⁸ Anĩ ere, ĩ ere ye irok? “Od anĩ õ wagen ibodok, are ogon sigor bun, ogon waũ bun ibodok,”§ are momoiya nē od amã wogõ maudig anĩ.

⁹ Are õ ogon sigorom, “Jesus ĩ Odug,” wo fen, õ waũ bun, Negur ĩ Jesus tamo gare den bun tamal kel turĩ fiyen anĩ, momoi wouf are, õ kel yaleyõf.

¹⁰ Are, taka ĩ wau bun momoi ye di, Negur ĩ madur bagai yef, age fe di, taka ĩ sigorom momoi auf ye di, Negurem ĩ kel yalouf.

¹¹ Are Negur nē Itotoya bun ibodok kilei, “Taka ĩ, ĩ nigin momoi youf, ĩ mama to bagai yalouf.”*

* **10:5:** Levitikas 18:5 † **10:6:** Diuteronomi 30:12 ‡ **10:7:** Diuteronomi 30:13 § **10:8:** Diuteronomi 30:14 * **10:11:** Asaia 28:16

12 Juda ado haiden bun fire fire sã, Odug de tekelei anĩ ganan nẽ Odug, ã idi diweignek ganan bun el fiya fatuk bagai ifenẽdidig,

13 are Negur nẽ Itotoya bun ibodok kilei, “Idi Odug nẽ yana dale diweignek ganan, Negurem kel gei fediyouf.”†

14 Age fiyauf are, naig fe di, idi ã nigin to momoi den ani diweignẽf? Naig de fen, idi to karĩ den anĩ nigin momoi douf? Taka nem to irokenẽdiyof are, naig de fen, idi karĩ douf?

15 Idi to sur fediyof are, idi naig de fen, od wogõ douf? Are Negur nẽ Itotoya bun ibodok kilei, “Idi biya od diroulef anidi, yeid gai meli bagai!”‡

16 Anĩ ere, Israel tunĩ biya od anĩ to dalen. Idi age difen nigin, Asaia eig ye iron, “Odug, aim anĩ nemã od nigin momoi yen?”§

17 Anĩ nigin, momoiya anĩ biya od karĩa bunem isidig, biya od karĩa are Kristus nẽ od bunem isidig.

18 Anĩ ere, aya to afef; Idi to karĩ dedig de? Momoi, idi karĩ den, are Negur nẽ Itotoya bun ibodok kilei,

“Neu arũ tamo neid aiteid, teneub ganan bun iyokelen,

dogo neid od teneub idikeleya bun ilen.”*

19 Baban aya to afef: Israel idi to kelein de? Uruwa bun, Negur Moses bunem iron,

“Aya tamo kayau yeneid sã idi bun age afe di, idi nigin ã kiyeĩ unogouf.

† 10:13: Joel 2:32 ‡ 10:15: Asaia 52:7 § 10:16: Asaia 53:1

* 10:18: Sam 19:4

Aya tamo kayau keleĩ sã idi bun age afe di, idi nigin ã nameĩ saneuf.”†

20 Takag, Asaia kukĩya sã eig ye iron,

“Idi aya to dimirnan, aya dileyauf.

Idi aya nigin to fiya san anidi bun, aya yug yaor afouf.”‡

21 Anĩ ere, Israel nigin ĩ eig ye iron,

“Naa tekelei adok, aya tamo kayau dõ fiya sã, fe temeleid bun

imau dõ au fen, tari afedif abodon.”§

11

Israel Idi Atun Musei Sã Dogol

1 Age fiyauf are, aya to afef: Negur ĩ yogon tamo kayau aulel fedin de? Sã bagai! Aya yug Israel temelou, Abraham nẽ ibor, Benjamin nẽ gĩ bun temelou.

2 Negur ĩ, yogon tamo kayau, ĩ mogo gariya bunem kelei ken igirnẽdin anidi to aulel fedin. Ereb Negur nẽ Itotoya bun Eliya nigin irok, are ĩ Negur ado, Israel idi nigin bou yũya od wogõ den anĩ, ã to keleĩ de?

3 “Odug, idi mogo ogon profet didenkeis fen, ogon alta narĩ difedin. Aya mugu dogol ditorna fen, idi aya dinakesiyouf nigin age difef.”*

4 Age ye di, Negur ere od solof irokenen? “Aya, aya yug nigin sewen tausen tamo idi idegẽya waitou Bal bun to iboreid bobou difen anidi, foi afen.”†

† 10:19: Diuteronomi 32:21 ‡ 10:20: Asaia 65:1 § 10:21: Asaia 65:2 * 11:3: 1 King 19:10, 14 † 11:4: 1 King 19:18

⁵ Age fiya gen, sain enei buneg, Negur wau ifenēya bunem musei sã igirnēdin anidi fau dibodok.

⁶ Igirīya anī, Negur nē wau ifenēya bunem isin, are tamo nē kabī bunem sã. Igirīya anī tamo nē kabī bunem isin ouf are, Negur nē wau ifenēya anī, wau ifenēya sa ken, mala ifenēya yenem.

⁷ Anī nigin, ada ere tauf? Ereb Israel idi kabī total dale fen, dimiren anī, idi to dalen, anī ere, Israel tunī musei sã Negur igirnēdin anidim dogol dalen. Israel tunī ganan Negur waud ifofakelen.

⁸ Are Negur nē Itotoya bun ibodok kilei,
 “Negur, idi kisi kurã fiya sã nē uur,
 meleid to dilouf nē ado,
 wedereid to karī douf nē anī ifenēdin,
 anī bunem isi gama naa enei bun.”‡

⁹ Takag, Dawid eig ye iron,
 “Neu kiwai tar, idi neid sifa nē tebol bun, saaf
 dokon waud kulī yen sain bun,
 idi suk bun gei difediyouf, idi kor bun gei
 difediyouf, idi neid el fiyam, dogo yeid tū
 difouf nigin ado, mala solo fiya nē darau,
 idi bun wō youf nigin aya orouf.

¹⁰ Dogo neid meleid gugum kele fen, to dilouf,
 dogo neid bagiyeid gai gai nigin fe fesilauf
 anī orouf.”§

Aa Taka Nē Were Aa Taka Bun Inoya

¹¹ Age fyauf are, aya to afef: Idi yeid tū fe di, kubū de fen, baban fāya kisi feleya sã de? Sã bagai! Anī fotokar, idi neid mosor nigin, kel gei

‡ 11:8: Diuteronomi 29:4; Asaia 29:10 § 11:10: Sam 69:22, 23

fiya are haiden bun isin, are Israel idi kiyeĩ dinouf nigin age fen.

¹² Anĩ ere, idi neid mosor nigin tenebur tamo kayau bun el fiya kisi feleya bagai wõ ye fen, idi neid kũ fenēya nigin haiden bun el fiya kisi feleya bagai wõ youf are, idi neid gire fiya anim naig fiya el fiya kisi feleya bagai irousyouf!

¹³ Aya ā haiden bun wogõ auf. Aya haiden bun aposel nigin, aya neu kabĩ nigin fatuk bagai yanau alesef,

¹⁴ are aya neu Israel tamo kayau turĩ afeid, idi kiyeĩ dinouf bun, idi tunĩ kel gei afouf nigin age afef.

¹⁵ Negur idi aulel fedin bunem, tenebur tamo kayau idi Negur geid komo fiya dalen ouf are, sain Negur idi yalediyouf bun, ere anĩ wõ youf? Are idi tamo kayau ganan gare den bun tamal mata kel fã den gen ouf.

¹⁶ Wit uyulil faat yun anĩ bunem sesewi fiya nē bret dinof, anĩ nē masak fateul ouf are, bret gananeg fateul. Warumutei anĩ fateul ouf are, were gananeg fateul.

¹⁷ Were tunĩ kokour fele fen, õ oliv aa kuĩ nē were, oliv aa bun bagu yõ di, oliv aa nē warumutei bun saaf tekelei waledig,

¹⁸ anĩ nigin, Israel idi bun, õ haiden yanã to wales. Õ yanã walesauf are, enei kisi wo: Õ warumutei to usennek, anĩ ere, warumutei anĩ õ isennok.

¹⁹ Anĩ ere, õ eig wo urõf, “Aya aa anĩ bun bagu fiyauf nigin were kokour feledin.”

²⁰ Are momoi. Ani ere, idi momoiya sã nigin kokour feledin, age fe di, õ momoiya bunem

ufaref. Ō yanã to wales, anĩ ere, õ kumĩ wouf.

²¹ Ere nigin, Negur ĩ Israel idi oliv aa nẽ were bagai yalelnēdiyof nigin to katū yen ouf are, ĩ õ nĩgineg to katū youf.

²² Anĩ nigin, Negur nẽ molol ado wau itenēya nigin kisi gouf, ĩ idi kubū den anidi bun wau itenen, anĩ ere, ã in molol bun toku ubodōgouf are, ĩ ã bun molol ibodōf. Anĩ ere, ã in molol bun to ubodōgouf are, ãg kokour yeikalauf.

²³ Israel idi momoiya sã bun toku to dibodōf are, idi baban aa oliv bun bagu fediyof, ere nigin, Negur ĩ baban idi bagu fediya nigin kisi feleya.

²⁴ Ō ogon gariya oliv aa kuĩ bagai bun tamal kokour fele fen, ogon gariya sã oliv aa bagai kulatun fedig anĩ bun bagu yon ouf are, oliv aa bagai nẽ were eneidi, naig fiya karika bagai dogo neid oliv aa bagai bun bagu fediyof!

Israel Ganan Kel Gei Fediyof

²⁵ Turau tar, aya waa enei ã to keleĩ youf nigin to orouf, are ã aug nigin keleĩ biya ado to gouf nigin age afef. Waa are, Negurem Israel tunĩ waud ifofakelen, anĩ bunem idi dibodok disi mog, haiden idi Negurem igirnēdin anidi ganan Negur wagen disiyof sain anĩ bun.

²⁶ Age dife di, Israel ganan kel gei fediyof, are Negur nẽ Itotoya bun ibodok kilei,

“Kel yaleyã tamo Saion bun tamal isiyof,

ĩ Jakop bun tamal Negur nẽ od dō fiya sã nẽ tobonunã anĩ yalelauf.

²⁷ Aya, idi geid bar itenēya nẽ enei atenēf,

anĩ bunem aya dogo neid mosor alelauf.”*

²⁸ Biya od nigin, idi ã nigin kiwai, anĩ ere, Negur nẽ igirĩya nigin, idi tubuid tar nigin, Negur idi nigin wau laa fedig,

²⁹ ere nigin, Negur nẽ ege luwa ado yogon igirĩya anĩ falei fiya kisi feleya sã.

³⁰ ã uruwa bun Negur dõ fiya sã, anĩ ere, ã gama, Israel Negur dõ fiya sã nigin, Negur nẽ wau yũya walegen.

³¹ Age fiya gen, idig gama Negur dõ fiya sã, are Negur nẽ wau yũya ã ifenein anĩ bunem, idig gama Negur nẽ wau yũya dalouf nigin age fen.

³² Age fiya nigin, Negur ã tamo ganan, dõ fiya sã nẽ kafĩ fiya bun inenẽdin, are ã idi ganan wau yũya ifenẽdiyof nigin age fen.

Negur Yana Yaleseya Nẽ Od

³³ O Negur nẽ kisi biya ado keleĩ biya, are kisi feleya bagai ilon bagai isilef.

Yogon es fiya anĩ imir ken, keleĩya kisi feleya sã,

yogon delẽ iyõdig anĩ dir feleya kisi feleya sã.

³⁴ Are Negur nẽ Itotoya eig ye irok, “Aim anĩ Odug nẽ kiši kelein?

Aim anĩ ã ulum iroukenen?”†

³⁵ “Aim anĩ Negur ifenen nigin

Negur ã aba kel ifenẽf?”‡

³⁶ Ada keleĩ, od enei are momoi, ere nigin, er eb er eb ganan ã bun tamal isif, er eb er eb ganan ã bunem ibodok, er eb er eb ganan ã bun ilef.

* **11:27:** Asaia 59:20, 21; 27:9; Jeremaia 31:33, 34 † **11:34:** Asaia 40:13 ‡ **11:35:** Job 41:11

Ī bun fula fiya medeīya faimud ibodōf! Mo-moi.

12

Mata Ibodōya Nē Sesewi Fiya

¹ Anī nigin, turau tar, aya, ā, Negur nē wau yūya ada ifanadan bunem totol bagai arokeneik, āgenei bouweī, mata ibodōya nē sesewi fiya, fateul ado Negur wau kulīya nē anī gen Negur wenēgouf. Enei anī, āgenei uurem Negur yana yaleseya.

² Tenebur enei nē oroya baban to dōg, anī ere, Negur āgenei kisi falei fe mata inoyeī di, āgenei kisi mata anī dō gouf, anī bunem, ā Negur nē oroya, are yogon biya nē, kulīya nē ado, kisi feleya nē oroya anī keleī youf.

³ Negur nē wau ifenēya bunem, aposel kabī yaleya nē yana aya ifanan nigin, aya ā ganan arokeneik: Taka ĩ yogo nigin kisi fouf anī to wal fe fen, kisi fouf, anī ere, momoiya Negur ifenen anī kilei, es fiya biya bun yogo nigin kisi fouf.

⁴ Ada bouwada tekelei bun fara fiya musei ado, anī ere, fara fiya ganan bun kabī tekelei sā,

⁵ age fiya gen, ada fara fiya musei, anī ere, Kristus bun, bouwada tekelei, fara fiya mugu mugu tunī ganan geid bagu fedif.

⁶ Negur wau ifenēya ada ifanadan kilei, ada Negur nē igirīya ege luwa fire fire ado. Tamo ĩ profet od wogōya nē igirīya ege luwa adouf, utornēg len, ĩ yogon momoiya kilei wogō youf.

⁷ Ī aruna yaleya nē igirīya ege luwa adouf, utornēg len, ĩ aruna yalouf. Ī ifelnēya nē igirīya

ege luwa adouf, utornëg len, ï ifelnëya kabï yalouf.

⁸ Ï wau yaleseya në igirïya ege luwa adouf, utornëg len, ï taka në wau yalesauf. Ï tunï lau fiya isennëya në igirïya ege luwa adouf, utornëg len, ï wau sã ifenëdiyof. Ï uyu irouya në igirïya ege luwa adouf, utornëg len, ï fõ fiya sã uyu irouya kabï yalouf. Ï wau yÿya ifelnëya në igirïya ege luwa adouf, utornëg len, ï wau kulïya ado age foug.

Wau Laa Fiya

⁹ Wau laa fiya are mala yaleya sã. Ereb sane anï seseg fen, ereb biya anï kafï weleg.

¹⁰ Æ abob bun tureï tar bagai nigin gen, wauï laa fiya bun wauï wenëgouf. Æ atun abob yana ketem ilun walesagouf.

¹¹ Æ to fõ yei ken, kabï total waleg. Ægenei uur në total bunem, Odug aruna walougouf.

¹² Wau iseya bun wauï kulï youf, morõ bun megeir ufaragouf, toku kosë gouf.

¹³ Negur në tamo kayau lau difef anidi wenëdigouf. Tamo urug waledigouf.

¹⁴ Idi ã darau difeneik anidi el fiya wenëdigouf, el fiya wenëdig fen, to usisnëdigouf.

¹⁵ Idi waud kulï yef geid kulï gouf, idi inã dalef geid inã walougouf.

¹⁶ Æ abob nigin wauï tekelei yenëf. Æ yeneï to walesagouf, anï ere, ã tenebur difaref geid nigal yÿya nigin ago gouf. Æ aug nigin keleï biya ado to gouf.

17 ã aib taka sane age yeik anĩ, aba sane to wiyẽgouf. Tamo ganan meleid bun ereb madur age fiya nigin karĩ walagauf.

18 ã kisi feleyauf are, ganan geid wau inosiya bun ubodõgouf.

19 Neu oboiyou tar, ã aug mala solo to wenẽdigouf, anĩ ere, Negur nẽ didi nigin modoũ unogouf, ere nigin, Negur nẽ Itotoya bun eig ya ibodok, “Odug irok, mala solo ifenẽya are neu. Ayam mala solo afenẽf.”*

20 Age fiya ban, Negur nẽ Itotoya bun eig ya ibodok,

“Ogon kiwai naũ fouf are, saaf wenẽ yãf,
ĩ naan ail fouf are, naan wenẽ yãf.

Anĩ agouf bun, ĩ yogon ereb sane age fen nigin mama sane falauf.”†

21 ã sane anim to wal yeĩf, anĩ ere, ãgem biya bunem sane anĩ wal gouf.

13

Gawaman Farumen Ibodõya

1 Tamo kayau ganan gawaman farumedin dibodõf, ere nigin, gawaman Negurem to inodin anĩ taka to ibodok. Gawaman gama dibodok are Negur yogo inodin.

2 Anĩ nigin, taka ĩ gawaman kiwai ifenek, ĩ ereb Negurem inon anĩ kiwai ifenek. Idi anĩ age difef, idi es fiya dogo bouweid bun dinouf.

3 Ere nigin, uyu irouya tamo, idi biya age difef anidi kumĩ to difiyẽdidig, anĩ ere, idi sane age

* 12:19: Diuteronomi 32:35 † 12:20: Proverb 25:21, 22

difef anidi kumĩ difiyēdidig. Uyu irouya ã õ to kumĩ ifonõf anĩ, õ oroyok de? Agouf are, ereb tobonunã biya anĩ ago wo di, ã õ yanã yalesauf.

⁴ Ere nigin, ã ogon biya fiya nigin Negur nē kabĩ tamo inenen. Anĩ ere, sane ago wouf, õ kumĩ wouf, ere nigin, ã dimig ege to irouf. Ì Negur nē kabĩ tamo, ã mala ifenēya tamo, idi sane age difef anidi bun Negur nē didi irou isif.

⁵ Anĩ nigin, ã gawaman farumen bagai ubodõgouf, are darau kumĩya bunem dogol sã, Negur mala bun ada biya be sane es fiya nē kisi nigineg ago gouf.

⁶ Anĩ nigin, ã takiseg unogedig, ere nigin, gawaman nē kabĩ tamo are Negur nē kabĩ tamo, idi dogo neid sain ganan gawaman kabĩ nigin difenēdig.

⁷ Æ ereb ganan ifenēya nigin yenek are wenēgouf, ã takis ifenēya nigin ouf, takis unogouf, ã safina yaleya nē takis ifenēya nigin ouf, safina yaleya nē takis unogouf, ã anini fiyēya nigin ouf, anini wiyēgouf, ã seli yabiya nigin ouf, seli wabigouf.

Abob Nigin Wauĩ Laaf, Naa Mogo Dodolef

⁸ Wareg taka to utorõge di, ibodõf, abob nigin wauĩ laa fiya nē wareg dogol ã atun ibodõf, ere nigin, taka ã ne tã nigin wau laa fef, ã lo dõf kisi felef.

⁹ Ìtãfiya eig ye irok, “Seseirã to uno,” “Tamo to ukeis,” “Bē to ule,” “Taka nē safina to malã ile orouf,”* Ìtãfiya eneidi ado ereb lo tunĩ ifaredif

* **13:9:** Eksodas 20:13-15, 17; Diuteronomi 5:17-19, 21

are, ãtãfiya tekelei eneim ganan irouf, “Õ ogo nigin waũ laa fef gen, nẽ tã nigin ago waũ laa fouf.”†

¹⁰ Wau laa fiya anim, ne tã bun sane to age fedig. Anĩ nigin, wau laa fiya are lo dõf kisi felef.

¹¹ Anĩ nigin, sain enei nigin wedereĩ fokõf fen, enei ago gouf. ã mulaĩ itorõya nẽ sain mogo isif, ere nigin, ada uruwa bun momoi taun bunem isi, gama ada neda kel gei fadaya nẽ sain anĩ melsak.

¹² Bõ are mogo sa kalau fenẽ, naa mogo wõ you fenẽ. Anĩ nigin, ada gugum nẽ tobonunã tator, yerin gadi tafel fen, lalan nẽ tobonunã biya anĩ dõ tafouf. Age tafe fen, ada, kusĩ nigin kusĩ nẽ naki tofol difonũdig gen, tobonunã biya anĩ, ada bun ibodõf nigin age tafouf.

¹³ Tamo kayau we feleyan lo difeid le di, tobonunã biya age difedig gen, ada tobonunã biya dõ tafouf, bilãya ado naan yõya bun sã, noli tobonunã ado bouwa nẽ oroya nigin tofol sane wau fãya bun sã, kusĩ ado kiyeĩ buneg sã.

¹⁴ Anĩ ere, Odug Jesus Kristus anĩ waleg, aug bun ufonũgouf, agog fen, bouwa nẽ oroya dõ fiya nẽ kisi anĩ bun to ufaragouf.

14

Momoiya Felu Reya Ado Momoiya Totol

¹ Taka ã momoiya felu ref are waleg fen, yogon kelei ã geid tekelei sã nigin to monẽ wiyẽgouf.

² Tamo taka in momoiya anim irõ di, ã erib erib ganan yõya nigin age fedig, anĩ ere, tamo taka in momoiya felu reya, ã sako dogol yõdig.

† 13:9: Levitikas 19:18

³ Tamo erēb erēb ganān yōdig anim, ne tā sako dogol yōdig to kono fiyēf, age fe di, tamo erēb erēb ganān to yōdig anim, tamo erēb erēb ganān yōdig bou bun od to yūf, ere nigin, Negur ī yalen.

⁴ Ō ai anī taka nē kabī tamo es wof? Ī kubū be youf, ifar bēf, are yogon Odug bun ibodok. Anī nigin, ī ifarauf, ere nigin, Odug ī yogo, ī ifareya nigin age fiya kisi feleya.

⁵ Tamo taka ī, naa taka anī naa ganān wal fiya gen iledig. Tamo taka naa ganān are de kilei kilei iledig. Idi mugu mugu dogo neid kisi bun anī nigin waud ditenēf.

⁶ Taka ī naa taka anī odug gen ilef, Odug nigin ye fen, ī age fef. Age fiya gen, taka ī yaro muda yoko, Odug nigin ye fen, yoko, ere nigin, ī Negur de fiyek. Taka ī erēb erēb tunī yōya nigin itorok, ī Odug nigin ye fen, agef fen, Negur de fiyek.

⁷ Ere nigin, ada takam yogo nigin mata to ibodok, ada takam yogo nigin to laa fef.

⁸ Ada mata tabodok are, ada Odug nigin mata tabodok. Ada gare tauf are, ada Odug nigin gare tauf. Anī nigin, ada mata tabodok be, gare taufeg, ada Odug nē.

⁹ Gariya enei nigin, Kristus laaf fen, mata kel fā yen, are ī tamo gare den ado tamo mata dibodok neid Odug ibodōf nigin age fen.

¹⁰ Age fiyauf are, ō ere nigin ogon turā es wiyek? Ō ere nigin ogon turā kono wiyek? Ada ganān Negur nē es fiya nē sia wagen tafarauf.

¹¹ Age fiya nigin, Negur nē Itotoya eig ya ibodok, “Odug irok, aya momoi bagai mata abodok nigin, iboreid ganān aya bun bobou difouf,

baleid ganan kurō difeis, Negur yana dale-sauf.”*

¹² Age fiya nigin, ada mugu mugu, ada dug nigin Negur kurō tafeis tarokenēf.

¹³ Anī nigin, ada abob es fiyēya tatorōf. Anī ban, ā tureī nē naab bun ereb naabura gudūf kenēya nē taka be, ye tūf kenēya nē taka to unogouf nigin lo walagauf.

¹⁴ Odug Jesus kisi fokō fel kana di, aya momoi bagai kisi afef, are saaf, Negur mala bun amuyē ado taka to ibodok. Anī ere, taka ī saaf taka amuyē ado youf are, ī yogo bun saaf anī amuyē ado.

¹⁵ Ereb ō woko anī bunem ogon turā ī wau morō wenēf are, ō waū laa fiya bunem to agof. Ereb ō woko anī bunem, turā Kristus ī nigin laa fen anī to daū wiyē.

¹⁶ Anī nigin, ereb ā biya gef anī, tamo kayau idi to sane douf nigin ago gouf.

¹⁷ Ere nigin, Negur nē tano are, saaf yōya ado naan yōya nē sā, anī ere, Awa Uur Fateul bun madur bagai, wau inosiya ado, kulīya nē.

¹⁸ Taka ī naab enei bunem Kristus aruna yalef, ī Negur wau kulīya ifenē di, tamo dile fen, biya douf.

¹⁹ Anī nigin, ada ereb maror inoya nigin ado abob yalesnēya nigin, kabī total talouf.

²⁰ Saaf bunem Negur nē kabī to daū gouf. Saaf ganan amuyē sā, anī ere, tamo ī saaf yōya bunem, ne tā, Negur nigin momoiya nē naab dōf mog ye isog yale di, kubū youf, are sane.

* **14:11:** Asaia 45:23

²¹ Õ, nē turā kubūya nigin yaro to wāf be, aai to wāf be, ereb takag to agouf, are biyauf.

²² Anī nigin, ereb ereb enei bun ogon momoiya naig be fe yenēf, are ò ogo ado Negur bun dogol ibodōf. Tamo ī, ereb ī momoi bagai kisi fen biya yef anī, age fef bun, ī yogo bou bun od to yuk are, Negur ī el fiyek.

²³ Anī ere, tamo ī kisi toguf fen, saaf yoko, ī yogo bou bun od yuk, ere nigin, yogon saaf yōya are momoiya bunem sã. Ereb ereb ganan momoiya bunem isiya sã, are mosor.

15

¹ Ada momoiya total ado, idi momoiya total sã neid morō faali tafouf. Ada dug wauda al fouf nigin to age tafouf.

² Ada mugu mugu, neda tã tar, idi neid biya fiya nigin ado idi yalesnēdiyof nigin, wau al fiya tafenēdiyof.

³ Ere nigin, Kristus ī yogog yogo wau al fouf nigin to age fen, are Negur nē Itotoya eig ye irok kilei, “Idi ò kono diyon anidi neid kono fiya, aya bun isin.”*

⁴ Ereb ereb ganan kulu ditoton are, ada ifel-nadauf nigin ditoton, are morō bun feseya sã ifareya bunem ado wau yaleseyā Negur nē Itotoya ani ifanadaf anī bunem, ada wauda iseya adouf nigin age difen.

⁵ Negur, morō bun feseya sã ifareya ado wau yaleseyā ifeneīdig ī, ã Kristus Jesus dōg mog, ã atun wau tekelei nē uur ifeneīf nigin aya orouf,

* 15:3: Sam 69:9

6 anĩ bun, wauĩ tekelei ado sigoreĩ tekelei bunem, ã Negur, neda Odug Jesus Kristus nẽ Tama fula fiya medeĩya wenẽgouf.

7 Anĩ nigin, Negur yana fula fiya medeĩya bun iselauf nigin, Kristus ã yaleyeyin gen, ãg abob walogouf.

8 Aya ã arokeneik, Kristus ĩ, Juda neid kabĩ tamo wõ yen, are Negur tubuda tar bun age afouf yen anĩ kilei bagai, Negur age fouf anĩ, megeir fe ifelnẽdiyof nigin ado,

9 haiden idi Negur nẽ wau yũya nigin, Negur fula fiya medeĩya difenẽf nigin age fen, are Negur nẽ Itotoya bun ibodok kilei,

“Anĩ nigin, aya haiden atun õ yanã alesauf, aya õ yanã bun seg alouf.”†

10 Baban ĩ irok,

“O haiden ã, in tamo kayau geid wauĩ kulĩ ye.”‡

11 Baban,

“Haiden ã ganan, Odug yana waleseg!

Tamo kayau ã ganan, ĩ yana waleseg fen, seg waleg!”§

12 Baban, Asaia iron,

“Jesi nẽ warumutei bun bali mata fokũ youf,

ĩ wõ ye fen, teneub ganan nẽ mudur ibodõf, haiden idi ĩ nigin waud isauf.”*

13 Wau iseya nẽ Negur, ã Negur momoi wiyẽg mog, wau kulĩya ado wau inosiya ganan, ã namein fi fele di, ise isokosauf, anĩ bunem, ã bun Awa Uur Fateul nẽ megeir bunem wauĩ iseya gogũ fouf nigin aya orouf.

† 15:9: 2 Samuel 22:50; Sam 18:49 ‡ 15:10: Diuteronomi 32:43

§ 15:11: Sam 117:1 * 15:12: Asaia 11:10

Pol, Haiden Atun Kabĩ Tamon

¹⁴ Neu turau tar, aya yug momoi auf, ã aug tobonunã biya barikã, keleĩ barika ken, abob ifelnēya nigin kisi feleya bagai.

¹⁵ Anĩ ere, wau ifenēya Negur aya ifanan anĩ nigin, aya ã gariya tunĩ baban wedereĩ fokõ youf nigin total ado atotkenein,

¹⁶ wau ifenēya anĩ bunem, aya haiden bun Kristus Jesus nē kabĩ tamo wõ au fen, pris gen Negur nē biya od wogõ auf, are haiden idi, Negur mala bun sesewi fiya biya, Awa Uur Fateulem fateuledin, wowã douf nigin age afef.

¹⁷ Anĩ nigin, aya Kristus Jesus bun, neu kabĩ Negur bun aledig nigin yanau alesef.

¹⁸ Aya ereb taka to wogõ au fen, ereb Kristus aya bunem age fen anĩ dogol wogõ auf, are aya ereb aya wogõ aun ado ereb aya age afen bunem, haiden idi uyu arou di, idi Negur sigor dõ difef anĩ, wogõ auf,

¹⁹ are aya Awa Uur nē megeir bunem, uris ado memelik nē megeir bun age afen. Anĩ nigin, aya Jerusalem anenem gariya ano fen, tokõ afel, Ilirikum provins ayo kele fen, Kristus nē biya od kisi feleya bagai yaor afen.

²⁰ Aya, idi Kristus keleĩ sã anidi bun, an biya od wogõ auf nigin, faimud kisi total aledig, are aya takam gariya inon anĩ bun, kabĩ to alouf nigin age afedig.

²¹ Are Negur nē Itotoya bun ibodok kilei,
 “Idi ã nigin to karĩ den are dilouf,
 agef fen, idi to karĩ den are keleĩ youf.”†

† **15:21:** Asaia 52:15

²² Aya biya od modoũ age fediyān wogōya nigin sain musei aledig anim, aya ã gein isiya nigin sain musei naaburau gudũ fedig.

Pol Rom Taun Ki Ileya Nigin Kisi Fen

²³ Anĩ ere, gama aya kabĩ yaleya nigin, akor enei bun modoũ taka sa ken, aya yar musei ã gein isiya nigin kisi total aledig nigin,

²⁴ aya Spein alauf bun asi fen, ailiyeĩf nigin kisi afen. Aya ileya bunem ki ayei ken, aya ã geid sain naal uyu kũ ta tabod ken, ã neu delẽ nigin usennagauf nigin wau isef.

²⁵ Anĩ ere, gama aya Negur nẽ tamo kayau aruneid yaleya nigin Jerusalem elef.

²⁶ Ere nigin, Masedonia provins nẽ sios ado Akaia provins nẽ sios idi, Jerusalem oun Negur nẽ tamo kayau atun maleg anidi isennẽdiya nigin waud al fen.

²⁷ Idi age fiya nigin waud al fen, momoi bagai idi, Juda idi bun wareg ado. Ere nigin, haiden idi, Juda idi neid uur nẽ el fiya dalen nigin, haiden idi Juda idi bun safina nẽ el fiya bunem wareg dũf.

²⁸ Anĩ nigin, aya kabĩ enei bure afel fen, idi isennẽya enei dalen anĩ ail fen, Spein ileya nigin asi fen, ki ayeĩf.

²⁹ Aya keleĩ, sain aya ã gein asiyouf bun, aya Kristus nẽ el fiya barikã ado asiyouf.

³⁰ Turau tar, neda Odug Jesus Kristus bunem ado Awa Uur nẽ wau laa fiya bunem, aya ã total bagai arokeneik, ã, neu kabĩ nẽ morõ bun, aya nigin Negur kosẽ wiyẽgouf bunem usennagauf.

³¹ Aya Judia teneub bun momoiya sã imedin tamal yalelna di, neu kabĩ Jerusalem oun Negur

nē tamo kayau an anidim dirouwauf nigin kosē gouf,

³² ago ge di, aya Negur nē oroya bunem kulīya ado ā gein asi fen, aya ā geid si tano fen, megeir alouf.

³³ Wau inosiya nē Negur ā ganan bun ibodōf. Momoi.

16

Pol Nē Aanya

¹ Aya nemā mainamā Foibe, Senkria taun nē sios neid kabī kayau biya ya anī, ā keleī youf nigin arokeneik.

² Ā Negur nē tamo kayau ago wiyēdigedig gen, ī Odug bun waleg fen, ī ā bun ereb lau fef anī usennēgouf, ere nigin, ī tamo kayau musei isenneīd fen, ayag isennan.

³ Kristus Jesus bun, neu kabī turau tar, Prisila Akwila ado, neu aanya wenēdigouf.

⁴ Idi aya nigin laa uyu ditoron. Aya dogol sā, haiden neid sios gananeg idi de difiyēdif.

⁵ Sios idi neid fō bun guru difedig anidig, neu aanya wenēdigouf.

Neu oboiyou Epenetus, Asia provins bun Kristus nigin ī ketem momoiya tamo wō yen anī, neu aanya wenēgouf.

⁶ Maria ā nigin kabī total yalen anī, neu aanya wenēgouf.

⁷ Neu sirag tar, Andronikus ado Junia* idi aya geid kalabus bun mabodon anidi, neu aanya

* **16:7:** Yana enī kayau nē yana. Itotoya tunī dum ditoton, are Junias den. Junias are tamo nē yana.

wenēdigouf. Aposel atun idi ilun bagai difaref, aya momoiya sã mog, idi ketem Kristus nigin momoi den.

⁸ Ampliatus, Odug bun neu oboiyou, neu aanya wenēdigouf.

⁹ Urbanus, Kristus bun neda kabĩ turada ado, neu oboiyou Stakis, neu aanya wenēdigouf.

¹⁰ Apeles ĩ nigin Kristus bun, tamo kayau biya difiyēdig anĩ, neu aanya wenēdigouf.

Idi Aristobulus nē ibor anidi, neu aanya wenēdigouf.

¹¹ Herodion, neu sirag, neu aanya wenēdigouf.

Idi Narsisus nē ibor Odug bun dibodok anidi, neu aanya wenēdigouf.

¹² Trifena ado Trifosa, kayau idi Odug bun kabĩ total daledig anidi, neu aanya wenēdigouf.

Neu oboiyou Persis, kayau taka Odug bun kabĩ total yaledig anĩ, neu aanya wenēdigouf.

¹³ Rufus Odug bun igirnen ado, yogon sina, ĩg aya neu naai, neu aanya wenēdigouf.

¹⁴ Asinkritus, Flegon, Hermes, Patrobas, Hermas ado, turada tar idi geid difaref anidi, neu aanya wenēdigouf.

¹⁵ Filologus, Julia, Nereus ĩ main ado, Olimpas ado, Negur nē tamo kayau ganan idi geid difaref anidi, neu aanya wenēdigouf.

¹⁶ Abob fateul bunem umã wiyēg fen, aan wiyēgouf.

Kristus nē sios ganan ã bun aanya sur difef.

¹⁷ Turau tar, idi, ã Negur nigin keleĩ walegen anĩ, ditor ken, ã fara diyei ken, naabureĩ gudũ

difedig anidi lo walagauf nigin, aya ã total bagai arokeneik. Idi sese wedigouf.

¹⁸ Ere nigin, tamo age fediya are, neda Odug Kristus aruna to daledig, anĩ ere, idi dogo neid oroya aruna daledig. Od dan biya ado mala yaleya nẽ od bunem, idi tamo kisi sã gen anidi didegnẽdidig.

¹⁹ Tamo ganan āgenei Negur nẽ od dõ fiya biya anĩ karĩ den, anĩ nigin, aya ã nigin wau fatuk bagai kulĩ yef, anĩ ere, aya ã ereb biya nigin kisi biya waleg fen, sane nigin soso gouf anĩ orouf.

²⁰ Wau inosiya nẽ Negur, mogo melsã Satan ã yeĩ farumen orok fouf.

Neda Odug Jesus nẽ wau ifenẽya ã bun ibodõf.

²¹ Timoti, neu kabĩ turau, yogon aanya ã bun sur fef. Neu sirag tar, Lusius, Jeson ado, Sosipater idig age difef.

²² Aya, Tertiussem pas enei atotof, Odug bun neu aanya ã bun sur afef.

²³ Gaius ĩ, aya ado ein sios ganan isennẽdidig, yogon aanya ã bun sur fef.

Erastus ĩ taun nẽ moni lo fiya tamo ado, neda turada Kwartus, idi neid aanya ã bun sur difef.†

²⁵ Negur ĩ, neu biya od ado Jesus nigin wogõya anĩ bunem, ã yalesnẽya kisi feleya. Biya od nẽ waa kulu bagai iminẽyan ibodon,

²⁶ anĩ ere, Negur mata ibodkeleya anĩ, profet irokenẽdi di, ditoton anĩ bun, kurõ falaisi gama yaoren, are teneub ganan ĩ nigin momoi de fen, dõ difouf nigin age fen.

† **16:23:** Itotoya tunĩ eig de ditoton: *sur difef.* ²⁴ *Ada neda Odug Jesus Kristus nẽ wau ifenẽya, ã ganan bun ibodõf. Momoi.*

²⁷ Negur ã yogo dogol kisi biya barikã, Kristus Jesus bunem fula fiya medeïya faimud ã bun ibodkalauf! Momoi.

Mata Ifeněya Ně Od
The New Testament in the Marik Language of Papua
New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Mar 2025 from source files dated 31 Aug 2023

d7099f9d-3bdf-5620-8eb3-7e6c51cab7ea